

AKASHVANI AIZAWL
REGIONAL NEWS UNIT

HOME MINISTER

Home Minister Pu K Sapdanga’n vawiin atangin Mizoram pumah ruihhlo do beihpuithlakna, 'Operation against trafficking and use of drugs and narcotics' kalpui tan a nih thu a puang.

Home Minister sawi danin he hmalakna ah hian sawrkar leh tlawmngai pawl tangkawp chuan Myanmar ramri hnaih khaw hrang hrang, ruihhlo luhka nia hriatteah ruihhlo tawlhruk dang chat turin hma an la tan nghal a ni.

Pu K. Sapdanga chuan, khawpui, thingtlang leh ramriah boruak ralmuang siam an duh thu leh ruihhlo tam tham tak man tur a awm reng thu a sawi a, ramri kana Mizorama ruihhlo rawn lutte tih reh tumin theihtawp an chhuah dawn thu a sawi a ni.



BIRTH&DEATH

Kumin January atanga April thla chung khan Mizoramah thla tin naupiang 1,827 an awm a, hetihlai hian thla tin mi 700 vel an thi a ni.

Mizoram sawrkara Economics & Statistics Department-in Mizoram Monthly Vital Report of Births and Deaths 2025 a tarlan tawh chinah, kumin January leh April thla chung khan Mizorama district 11-ah naupiang 7,307 an awm a, mipa 3,710 leh hmeichhia 3,597 an ni a, Chawhrualin thla tin naupiang 1,827 an awm ang a ni.

January atanga April thla chung vek hian district 11-ah mitthi 2,801 chhinchhiah a ni a; mipa 1,816 leh hmeichhia 985 niin, thla tin mi 700 an thi ziah ang a ni bawk.

Economics & Statistics Department-in thla 4 chung report a neih chinah hian kum 1 hnuai lam thi 86, kum 1-5 inkar thi 13 leh thisaa naupiang 34 an awm bawk a ni.



NATIONAL HIGHWAY-06

PWD minister Pu Vanlalhlana’n Kawnpui leh Khamrang inkar National Highway-06 kawngpui chu July ni 7, 2025 khan NHIDCL-in Mizoram PWD kut

atanga an lak thu leh kawngpui chhiat chhan chu state sawrkar mawhphurhna a nih loh thu a sawi.

Assembly Session neih zawh takah khan PWD Minister hian Opposition Leader Pu Lalchhandama Ralte-in, Kawnpui leh Khamrang inkar NH-06 kawngpui chungchanga kawng chhiat chhan state sawrkar mawhphurhna a nih leh nih loh a zawhna chu ziaka chhangin, state sawrkar mawhphurhna a nih loh thu a tarlang a ni.

PWD Minister chuan nikum October ni 7 khan NHIDCL hnenah Kawnpui leh Khamrang inkar National Highway-06 kawngpui hlanna thawn fel vek a nih tawh thu sawiin, nikum October ni 28 khan NHIDCL hnenah hian kawngpui inhlanna chu thawn let tura an tih thu leh kumin January ni 3 leh March ni 26 khan an thawn nawn leh thu a sawi a; NHIDCL lam hian July ni 7 khan kawngpui inhlanna lehkhaah an sign ve chauh thu sawiin, Mizoram PWD-in NHIDCL kuta NH-06 an hlan ni hi March ni 26 ni mah se, NHIDCL-in an kuta an lak ni erawh July ni 7 a nih thu a sawi bawk.



CM

Chief Minister Pu Lalduhoma’n 3rd Mithun Day leh National Seminar on Integrated Mithun Farming, Mizoram AH & Vety Department leh ICAR- CIRG tangkawpin Thenzawl Auditorium-a an buatsaih chu khuallian niin a hmanpui.

Chief Minister chuan Sial vulh chu hmarchhak mipui tam takte nunphung nen an inzawm tlat a, Mizo hnam nunah pawh dinhmun pawimawh tak luahtu, hausakna tehkhawng atana hman thin a ni a ti a. Vawiin thlengin chhungkaw tam takin eizawwna pengah Sial vulh an la kalpui a, khaw 41 velah an uar zual tih sawiin Sial hlutna hi a tlahniam thei lo va, eizawwna kawngah dinhmun pawimawh tak a chang zui zel tih a sawi a ni.



EMRS STATE LEVEL SPORTS MEET

Tukin khan ni thum (3) awh tur 4th Mizoram Eklavya Model Residential School State Level Sports Meet chu RG Stadium, Mualpuiah tan a ni a, EMRS 11 ten sports discipline hrang hrangah an intihsiak dawn a ni.

Eklavya Model Residential School hi Ministry of Tribal Affairs hnuaiah National Education Society for Tribal Students in a enkawl a, Mizoramah chuan Mizoram EMRS Society hi Planning & Programme Implementation Department hnuaiah a awm mek a ni.

He Scheme kaltlang hian India ram chhunga tribal naupang zawng zawngte tan zirna a thlawn vekin pek an ni a, school te hi CBSE hnuai a affiliation tih niin, pawl 6 atanga 12 (Arts, Science & Commerce) thleng zir theihna a ni. Tun

dinhmunah Mizoramah EMRS 11 awmin, RD block 5 ah hawn belh leh tura hma lak mek a ni.



PRESIDENT

President Droupadi Murmu chuan vawiin tlai hian Mysuru ah AIISH Diamond Jubilee ah khuallian niin a hmanpui dawn.

President chuan he hunah hian AIISH a enkawl naupang te a kawm dawn a, Diamond Jubilee lawmna inkhawmah hian Diamond Jubilee logo leh postal cover a tlangzarh dawn a, President hian inbiakpawhna lam a harsatna leh enkawlna hmun chungchang ziahna ‘The Pulse of Communication, AIISH in Action’ tih chu a tlangzarh dawn bawk a ni.



PM MODI

Prime Minister Narendra Modi leh Russia President Vladimir Putin te chu SCO Summit neihna China-a Tianjin khawpui ah ram tan a thil pawimawh sawiin an inkawm.

Pu Modi chuan India leh Russia chuan hun harsa an tawh lai pawh in an thawkdun reng thin tih sawiin, khawvel a remna leh muanna, hmasawinna a awm zel nan ram pahnih te thawhdunna chu a pawimawi hle a ni a ti a ni.

